

*Isabel Etxebarria*

URRUÑAKO HAUTETSI ABERTZALEA

## Mila, mila esker!

**H**amabost urte Urruña eta Goierriko ikastolen arteko harremana sortu zela, Urruñan ikastola berria eraikitzeko. Hamabost urte ekipa osoak lan eta lan aritzen direla, laguntza ederra ekartzen zaiola ikastolako ibilmoldeari, ekintzak antolatzen direla hurrekin.

Gehienetan Hazia elkarteak Herriko Etxearen aldetik trabak eta zailtasunak ezagutu ditu, kantaldiaren errezibitzeko. Urtero tira-birak gainditu behar izan dira euskal kultura eta ikastolak ez baitira ulertuak izan hautetsi mundu hertsia horretan. Haatik, ikastola handitzen doa, txikia gelditu da. Hautetsi nagusiek euskararen aldeko hitz handiak erabiltzen dituzte, erabat aldekoak direla! Alta, errealitatea bestelakoa da. Paskal Indo bera, Parisko arduradunekin bildu ondoren itzuli zaigu berriarekin, irakasle postuak kentzeko bidean daudela Hezkunde Nazionaletik. Horrek beharretan utziko gaitu, ikastolen eraikitzeko, irakasleen ordaintzeko, haurrentzako ekintza dinamikaren bultzatzeko, euskararen indartzeko ikastolan.

Horretan gaude, ikastolen laguntzeko lana ez da gelditzen. Hor dago, hain era naturalean askotan anitzek ez dutela ikusten ere! Laguntza gehiago eskertuko litzatekeela ere beharrak ez baitira txikitu, botere publikoek ez baikaituzte laguntzen euskararen egoeraren heinaren araberrako neurriekin. Bai, ikastolek



GAIZKA IROZ

laguntza behar dute gure haurren geroa euskalduna izan dadin, gure hurrek beren geroa euskaraz izanen dela erabaki dezaten. Erakutsi behar diegu bide ona dela, gustura eramaten dugula euskaldunak izaten jarraitu nahi dugulako, euskararen mundua gurea delako eta maite dugulako.

Hazia elkarteak Goierriko ikastolarekin antolatutako kantaldia paregabea izan da, hor ikusi baititugu euskararekiko konpromisoa aspalditik hartu dutenak eta bihotzez daramatenak. Benito ikusi dugu, Benito urte luzeetan egoera latzak ere jasangarriagoak izaten lagundu diguna, hor ere emozioak azalarazi dizkigu; harekin bere musikari guztiek! Urruñako publikoa irabazi du eta herritarrak ikastolarengana hurbildu. Beñat, gure “artista” kantaldi honen bultzatzaile nekaezina, beste askoren ondoan. Denak tokikoak, itzalean ari direnak, ikastolaren alde, geroa hortik iraganen baita.

Bukatzeko Pirritx, Porrotx eta Mari-motots, urte guztian bizitza alaitzen digutenak eta urtarrilaren 2an bi emanaldi eskainiko dituztenak gure ikastolen alde.

Euskararen mundua asko ematen digu eta horrela jarraituko du, hau baita bidea, elkarlana eta gehienetan musu-truk edo ia. Hau da bidea, loturak sortzen dituen, kentzen ahal ez digutena, gure hurrei poza, plazerra ematen diena. ■

Erakutsi behar diegu

bide ona dela, gustura

eramaten dugula

euskaldunak izaten

jarraitu nahi dugulako,

euskararen mundua

gurea delako eta

maite dugulako

## HIRUKO TXIKIAN

*Joxemari Ostolaza*



Aldean egokitu zait bertako hauteskunde bezperatan ibiltzea. Alderdietako lehia izango genuela inguratuko gintuen ia gai bakarra pentsatzen nuen.

Oker nenbilan, aspaldiko bozketarik txatxuenaren aurrean geundelakoan itzuli ginen. Ibili garen entresetako jendearen artean ez genuen inongo aipamenik entzuten, eta gure jakin-nahiaren galderei, ezaxolazko keinuz erantzuten zieten gehienetan. Asper-asper eginda sumatu ditugu bisitatutako bazterrak, jokoan legokeenaren emaitza, edozein izanda ere, deus on berriek ekartzeko kapaz ez balitz bezala. Eta zerbait esateko gauza

## Katalunia

ziren ale sueltoek, CIUren garaipen ziu-rak ez zituen batere berotzen, deus aldatzeko gauza ez bailiran. Sekulako abstentzioa gertatuko zela zirudien, gu

behintzat aski garbiki itzuli ginen hori ondorioztatuta. Baina hara non, emaitzek besterik erakutsi digute eta parte-hartzeak gora egin du. Hangoa ikusirik, PSEk guztiak eta bi egingo ditu hemen ahal dela bereari eusteko, eta hori gertatu dadin, ezker abertzale osoaren parte-hartzea eragotzi behar du kosta ahala kosta. Badaki, jakin, eltze hori ezingo duela egosi bere nahierara ezker abertzalea barruan bada, eta konjeladorean atxikitzea izango du bere estrategiaren oinarri ia bakarra. ■